

Imm. 106:

Puisit amiinik tunisassiornerup qanoq siuarsarneqarsinnaanera kiisalu suut qanorlu iliuutsit sineriapput tamakkerlugu puisit amiinik tunioraanerup siunissami qaffasissumiitturnissaanut iluaqutaasinnaanerat pillugu apeqquteqaat aallaavigalugu oqallinnissamik siunnersuut.

Inatsisartunut ilaasortaq Lars Poulsen, Siumut

Imm. 160:

Qanoq iliornikkut puiserpassuit pisarineqartartut amiiginnariarlugit ilivitsuutillugit imaanut eqqaannarneqartartut pinaveersaartissinnaaneri pillugu apeqquteqaat aallaavigalugu oqallisissiasatut siunnersuut.

Inatsisartunut ilaasortaq Siverth K. Heilmann, Atassut

Akissuteqaat

Nunanut Allanut, Inuussutissarsiornermut Niunernermullu Naalakkersuisoq

Siullermeerinnineq

Inatsisartuni ilaasortaq Siverth K. Heilmann, Atassut aamma Inatsisartuni ilaasortaq Lars Poulsen, Siumut apeqquteqaat aallaavigalugu oqallisissiorsimanerannut Naalakkersuisut sinnerlugit qutsavigaakka.

Suliassaq pingaaruteqartoq matumuuna saqqummiunneqarpoq, Naalakkersuisullu unammilligassat piniartunut amernillu puisit amiinik tigooraasunut maanna atuuttuusut eqqumaffigaat iliuuseqarfigerusullugillu. Puisit amii aamma neqaat kulturitsinni inuiaqatigiinnilu pingaaruteqartuupput iluaqutaallutillu. Taamaattumik Naalakkersuisut isumaqarput ajornartorsiutitaqartoq puisit amiinik tigooraasuvut aningaasarsiornikkut nammagassamik taamak annertutigisumik tigumiartuummata, amerlasuutigummi taakkua nammineq pigisatig toqqorsivittut atortariaqartarpaat, tamatumunngalu akilerneqassanatik. Naalakkersuisut nunatsinni ammit sapinngisamik ikinnerpaat qatangiinnartinneqartarnissaat anguniarlugu ukioq manna Kalaallit Nunaata Ammerivia aningaasaliissutissanut sillimmatiniit aningaasaliiffigaat amernik tigooraasut imminnut tikillutik pikkorissartinneqarsinnaaqqullugit. Naalakkersuisut aningaasaliissuteqarnerisigut nuannaarutigaa amernik pisiortortartut 34-it tamarnik tunitsivinnersut aammalu qitiusunik ingerlatsivinnit marlunnersut imminnut naapinnissaminnut maanna periarfissaqalermata. Pikkorissarnissaq pilersaarutaasoq puisit amiinik tigooraasut pikkorissarnissaannut aqutissiuussissaaq, ammit amerlanerpaat atorluarneqarnissaat anguniarlugu amernik tigooraasut periarfissikkumavagut misilittakkaminnik paarlaasseqatigiittarnissaannik, kiisalu unammilligassaminnik ernummatiminnillu Kalaallit nunaata Ammerivianut apuussisinnaaqqullugit.

Pikkorissarnermiit angusaasut tusagaqarfiginissaat qilanaaraakka.

Puisit amiinit nioqqutissiat soqutigineqarnerat annertusiartorpoq, taamaattumillu aamma puisit amiinik pitsaasunik amerlanerusunik pisariaqartitsisoqarpoq. Taamaammatt Naalakkersuisut isumaqatigaat puisip tamarmiusup iluaqutigineqartarnissaa tamatigut anguniarneqassasoq igitsiinnartoqartarneralu unitsinneqassasoq. Naalakkersuisuni kissaatigaarput maannamiit annertunerusumik uagut kalaallit nerisassaatsitta pisortat ingerlatsiviini utoqqaat illuinilu iluaqutigineqalissasut. Taamaattumillu Naalakkersuisut tapersorsorumavaat neqit sinnerinik amernillu pitsaanerusumik iluaquteqarsinnaaneq pillugu misissuisoqassasoq. Naalakkersuisut

tikkuarumavaat maanna piujuaannartitsinermik tunngavilinnik suliniutinik ingerlatsisoqareemat, sinnikunik pisiortortarnermik qimminullu nerukkaatissiornermik ingerlatsiviusumik. Tamannami danskit inuussutissalerinermut inatsisaanni ilaangilaq, suliassaqarfik nunatsinni niuerfiusup nammineq ilagimmagu. Neriuppunga aallarnisaasartut amerlanerusut isumassarsiaminnik tunngavilinnik amerlanerusunik suliniuteqartalerumaartut, taamaasilluni puisip tunniussinnaasai tamaasa atorluarneqartarsinnaassammata.

Kalaallit Nunaata Ammerivianut aningaasaliissutaasartut ukiuni kingullerni allannguuteqartarsimanngillat. Nunarsuatsinni akit qaffakkiartornerat piniartut, amernik tigooraasut Nunatta Ammeriviatalu siusinnerusumut sanilliullugu aningaasartuuteqarnerulernerannik kinguneqarpoq. Taamaattumik aningaasaliissutaasartut iluaqutigineqartarnerat sapinngisamik annertunerulersikkumallugu periaatsit maanna atuuttut ilaasa allaanerusumik aaqqiissuunneqarsinnaaneri eqqarsaatigalugit misissuinissamik pisariaqartitsisoqarpoq. Kalaallit Nunaata Ammerivia piffissami matumani sinerissatsinni ingerlatsivinnik piginnittuunngilaq. Siusinnerusukkut misissorneqarnikuugaluarpoq atortulersuutinik pisisinnaaneq aamma attartorsinnaaneq, tamannali maannamut aningaasassaqaartinneqarani. Naalackersuisut isumaqatigaat aaqqiissutissarsisoqartariaqarmat, puisit amiinik pisiniartartutta nammagassanik tamakkiisunik tigumiaqarnerat aaqqiissutissarsiumallugu. Inatsisartut kissaatigippassuk Kalaallit Nunaata Ammerivianut aningaasaliissutit annertusineqarnissaat, tamanna Naalackersuisut tapersersussavaat.

Soqutigintumik oqallittoqarnissaa qilanaaraara.